

نبيلة محمود

بحر الحياة

أشعار وخواطر

صدرت الطبعة الأولى فى أغسطس 2019

بطاقة الكتاب

بحر الحياة	عنوان المؤلف
نبيلة محمود	المؤلف
أشعار وخواطر	التصنيف
2019 - 15542	رقم الإيداع
978-977-6726-51-2	الترقيم الدولي
467 الطبعة الاولى اغسطس 2019	رقم الإصدار الداخلي
100 صفحة	عدد الصفحات
مؤسسة النيل والفرات	تصميم الغلاف

جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب أو ترجمته أو الإقتباس منه أو نشره على النت الا بموافقة كتابية وموثقة من المؤلف

مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



مؤسسة
النيل والفران
للطبع والنشر والتوزيع
أسسها الشاعر ناجى عبد المنعم
حزيران 2017

رخصة مزاولة مهنة: 58365 - سجل تجاري: 13242 / 2017 - بطاقة ضريبية: 01-35-572-
 عضو عامل باتحاد الناشرين المصريين رقم 941 لسنة 2018
 هاتف: 01011256943 - 01116202218 - 01202541192 - 0120554372901 طيفاكس:
 النيل والفرات nagegy200064@gmail.com
 alnilwaalfourat alnilwaalfourat@gmail.com
 الخمر الرئيسي: ج.م.ع. محافظة الشرقية - العاشر من رمضان - مجاورة 13 - أمام سنتر الـ13 - مقار 304

اهداء

الى كل من يرى الحياة قاسية
اضحك وابتسم للحياة
وكن متفائلا
بأن الحلم يتحقق بالارادة والطموح
ويأتى النجاح والفرح

نبيلة محمود

بحر الحياة

بحر الحياة واسع وساعات غريق
ونجم الطريق يشاور لنا على اكثر من طريق
إزاي تعديه من غير رفيق
حبيب يهون عليك الطريق
صاحب جميل ويكون دليل
لما الدنيا حواليك تضيق
دى الحياة ساعات تهدى وساعات تمد
ساعات بترخى حبالها لينا عشان تشد
واحنا دايمنا بناخذها جد وبسرعة بنرد
ونشيل لهموم للحيل تهد
بنخاف من السنين وبنرضى ب أى حد

ونتوه ف الطريق من غير أمل
وبنشكى من حظنا وإيه العمل !!
نقى رفيق حياتك أوعى ترضى باى حد
اختار صديق مخلص جدع بجد
حاسب لتضيع منك أحلى السنين
والحياة تخليك تبقى حزين
الحياة بتحب اللى يحبها
اوعى تخاف من عندها ...حاول تحلى مرها
حاول تعدى بحرها خليك جري

ضحك السنين

بتجرى بينا السنين
وبننسى نعدھا
ساعات نجرى معاھا
من خفة دمھا
وساعات تكون سخيفة
وتخبى وشھا
وبنحاول نزقھا
ونفك لغزھا ونحنن قلبھا
بتفرحنا يومين
وبننسى إحنا فين
وننسى كل اللي جرى لنا منها

وفجأة ومن غير مناسبة
تلف علينا حبها
وتكثر المشاغل
وتزود المشاكل
ونحتر منها
وتتعب اللي يقول أنا قدها
وتلهيه ف عندها
وذكريات وعدت و معاها أهلها
وكتير بنشتاق لها
وصغيرين كنا بنستعجل الأيام
وبنرسم الأحلام
وندعى يارب نكبر
اوام ونحسد الكبار ونقول
امتى نكبر زيها

جريت بينا السنين
من غير ما نستطعم حلوها
إزاي وامتى
محسناش بجريها !!!
مشيتنا فى طريقها
وبطولها وعرضها
طيرنا مع النجوم
ونسينا الهموم
وسمعنا ام كلثوم
وجرينا نسابقها
فى ظل شجرها
وجنب وردها
وقابلنا ناس ياما ..
ناس لسه معانا

وناس نسينا شكلها
وناس عاشت جوانا
وعمرنا مانسى فضلها
وحققنا احلامنا ..
بعضها بس مش كلها
وظلمتنا السنين
ومهمناش ظلمها
مليناها حب وسعادة
وما خفناش منها
طلعت قاسية وصعبة
واحنا اللي كنا بنشتاق لها
طيب فين الحنية ..
حد يقول لها
حتى الحظ ماشى فى ظلها

... ننادى عليه

يقول خذوا الإذن منها !!

شأيفها إزاي بتتضحك

ولا بيهمها

وبتجرى بينا السنين

وبنسى نعدھا

حب الناس

حب الناس خليك حنين
بس أوعى تبين الطيابة
لكن للقوة لازم تبين
فى ناس زى الديابة
والناس بتطمع ف الحنين
والشر ماسك ربابة
وكلام الناس كتير بيوجع
والحياة عاوزة الصلابة
الناس بتحب اللطيف ...
لكن بتعتبره ضعيف ...
اتظاهر بالقوة دايمًا
وابعد عن الكلام السخيف

والحق مفيهوش مجاملة
والناس بتظلم الضعيف
وتحمل عليه وترمى ...
وبتاكل حقه وتغمس بيه الرغيف
الوشوش هيه هيه لكن
النفوس هيه اللى اتغيرت
حتى الأعمال الخيرية
مع الغلابة اتصورت
والمشاغل زادت عن زمان
مع إن الدنيا اتطورت
والناس بتخاف م الناس
القوية مهما فى اعمالها اتهورت
خليك ف نفسك أمير
ف الكلام وف المعاملة

اعطف دائما ع الفقير
بالفعل مش بكلام مجاملة
البطولة زمان كانت حصان وفارس.
عدا الزمان وانتهى زمن الفوارس
البطولة الآن محتاجة حكمة وعلم
وعقل يكون دائما عليك حارس
الدنيا احسن معلم
ياما منها راح تتعلم
وح تعرف اللي مخدوش ف المدارس
واوعى تظهر الطيابة
احسن بيسموها خيابة
حتى الناس اللي كنا فاكرينهم غلابه
خدعونا ودفعنا تمن الطيابه
وكله فى بعضه بيقطع

والشباب لبسوا ع الموضة
المقطع وكلوا بقى ع انت غارس
والحياة محتاجة صحوة
ونبتدى بجيل المدارس
لازم نحافظ على المبادئ والقيم
بيها ح تزيد النعم
وغيابها ح يسبب كوارث
وحب الناس خليك حنين
بس أوعى تبين الطيبة

الحب قدر ولا قسمة !؟

يا ناس الحب ده

قدر ولا قسمة

ولا بييجينا يعلمنا الحكمة

ولا ينفع معاه حذر ..

وتقع فيه والسبب ..كلمة

والحب لا بيشتري ولا بينباع

والحبيب لو صادق يكون نعمة

لكن الطباع ما بتبان الا بالعشرة

وياما ناس طلعو ذهب قشرة

والحب بيجى من غير سبب

ويمشى لما تنتهى القسمة

والحبيب لو غدر ...
والقلب م الحزن انكسر
العقل بيسكت ولا بيقول ولا كلمة ...
ويشمت فينا البشر ونتعجب من القسمة
والنسيان دوا يكلمة الرضا بالقسمة
لاتعاتب القاسى ولا تفكر الناسى
ارمى ورا ظهرك
والحبيب لو طلع قاسى
ح يحيرك وينقسم ظهرك
وسألت حكيم هو ليه
مليش ف الحب الجميل قسمة !
قال الورد جميل والكل بيه انبهر
بس الشوك كان ليه قسمة
والطير بيغنى فرحان على الشجر

والدنيا قدامه مبتسمة
لكن الصياد لما عجة جمال الطير
فى القفص حبسو
والجمال كان علىة نقمة
والحظ من المحال
يبقى مع جميل الشكل والقسمة
ودنيا غريبة
ومحدث عارف ايه الحكمة !!
ياترى الحب ده قدر ولا قسمة !!

إفهم نفسك

بندور على يفهمنا
واحنا مش فاهمين نفسينا
وبنمشى مش باصين
قدامنا وبتتلفت على ماضيينا
وبنحلم ونعيش احلامنا
وبننسى واقع قدامنا وكان
الحاضر مش ليينا
وبنتمسك بللى تعبنا وبنبعد عن
اللى شارينا ،،، ونفكر فى اللى
ح يحصل ويعدى الوقت عليينا
يسرق منا طعام الفرحة

وبيشغلنا ويفكرنا بللى ناسينا
ليه الأيام قاسيه علينا
فين الحب فين الحنيه
فين الروقان فى سماع اغنيه
بتلمس فينا ماشعرنا وايام غاليه
علينا وحبائب نسيت عشرتنا
بس احنا واللا مانسينا
هوا مفيش دوا لجراحنا ،،،،،
ولا عشان مش باينة علينا
وساعات بنصدق كداب ،،،،،،،
ونقابله بضحكة
وترحاب ونقول اهه بيسلينا
وساعات نبعد على ينصحننا
وكلامه اثر فينا

ووجعنا وغمضنا عنينا
وغريبة ليه احوالنا ليه
بنصدق كداب وبنتحمل اللي ظلما
ونقول يمكن عنده اسباب !!

شوية حنان

أجبر بخاطري يازمن
اديني شوية حنان
فتح لي ورود الأمل
رجع لي فرحة زمان
صلح لي كل اللي اتكسر
اهدي لي فرح و أمان
سألت الطير ع الشجر
هو انت ليه فرحان
قال ح يفيد ايه يعنى
وليه اعيش زعلان ...
انا فرحان بغنى

ولا حاجة شاغلة البال
رزقى يوم بيوم
وعيشتى عال العال
وانت ليه بتحسدنى
ع الغنى والألحان
قلت يابخت الطير
ياريتنى زيه ولما جناح وريش
اطير وعلا فى الفضا
ولا عمرى اشكى العيش ...
ولا كنت اندم ع اللى مضى
واتصرف بجرأة وطيش
وجيت اغنى واسمع الالحان
صوتى على .. اشتكوا منى الجيران
أحترت اشكى لمين همى

صعبت ع الحيطان
آه منك يازمن
خليت الطير فرحان
سابع ف الفضاء
يغنى وعشه فوق الاغصان
وكتير من البشر سيبته ليه حيران
اللى قلبه انكسر
واللى بيشكى من الخذلان
فينك ياخاتم سليمان
فين الحب والحنان والأمان
عجبي عليك يازمن وكل العجب
إيه السبب !!
تسعد قليل الاصل
والاصيل تعبان ...

لو تسمى

أوعى ف مشاكلك تسرحى

ولا بأسرارك تصرحى

أوعى همومك تغلبك

وقلة النوم تتعبك

اضحكى من قلبك كركرى

بلاش تسهرى وتفكرى

لو تسمى

مش كل كلمة تزعلك

مش كل حاجة تحيرك

خلى مزاجك دايمًا رايق

أصل الحياة عايزة الفايق

... حا سبى من دوامة الايام تبلعك
تنسى نفسك ومين ينفعك
خذى الامور زى ماهية
مهى الايام معدية
... محتاجة ناس بس قوية
بالعقل مش بالعضلات
.. خليكى هادية بلاش عصبية ..
بالراحة تتحل الأزمات
لو تسمى
ابتسمى للحياة وافرحى

ازوقى وروقى
ولشعرك الجميل سرحى
أملى حياتك بالأمل
قولى لورودك فتحى

الولاد عوديههم ع النظام
عرفيهم الحلال من الحرام
وزعى عليهم المهام
متقوليش لأ حرام
لو تسمى
أنت اللى معاكى كل الخيوط
أنت أساس كل البيوت ...
انت الأمان أنت الحنان
أنت الكلام وبتعرفى امتى السكوت
لو تسمى
أوعى لنفسك تهملى ..
ولا عشان راجل أنانى تتحملى
وتشيلى فوق طاقتك زيادة
ح تكبرى قبل الأوان

لو تسمى
لو تعبانة من الأعباء رىحى
على نفسك لازم تطببى
واجهى المشاكل
بالذكاء ليه تهربى
الحياة حلوة وجميلة
من كاسها لازم تشربى
والدنيا واسعة وكبيرة
اخرجى وعليها افرجى
شوفى لك هواية تكون جميلة
بلاش تبقى قليلة الحيلة
وتقومى ف العيال تضربى

حبينا من قلبنا

حبينا من قلبنا

بس لقلوب جاحده

اتساهلنا ف حقنا

مسكوا لنا ع الواحدة

راعينا فيهم ربنا

مشيوا مع كام واحدة

شوفنا العجب منهم

وخوفنا من الوحدة

ضاعت سنين عمرنا

ولا حد بينا حس

ياترى ده من حظنا

ولا بختنا كان نحس
ولا قدر أكتب علينا
واحنا نفذناه وبس
وعاتبنا حظنا ليه
بعتنا بالبخس !!
قال مانتوا عارفين
ماليش مكان ابدأ
مع الحلوين
قلنا له استنى وفين رايح
طب ادينا شوية نصايح
ابتسم وقال لنا رايح لعفانتهم
والحلوين كفاية
عليهم حلاوتهم
وصبرنا وطل صبرنا

كان فيه أمل عندنا ...
وقولنا يمكن الحظ يرجع لنا
ويمكن تاه او زعل يمكن !
ولاخوفنا من المجهول نفعنا
واحترنا مع الواقع
ليه بيوجعنا
واتغدر علينا الحاضر
واتكبر الممكن ...
قولنا يمكن يتعدل يمكن
مشينا طريقنا لوحدنا
خلينا توكلنا على ربنا
واللى ماقدر حبنا
شيلناه من قلبنا ..راميناه
فى ابعد مايمكن

والاختيار كان مهارة
بس يا خسارة مكنتش عندنا
ولا حد نصحننا ولاقال لنا
يمكن...ويمكن ...
حبيننا من قلبنا
بس لقلوب جاحد ه
أصل الحياة
بتتعاش مرة واحدة

يابحر موجك عجب

يابحر موجك عجب

دايما مليون اسرار

غامض وكنك غضب

جوفك ملوش قرار

خافوا منك البشر

قالوا عليك غدار

امواجك دايما عالية

مليون لآلى عالية

لكن ممكن ف ثانية

تغلب البحار

وفيك قالوا الحواديت

على عروسة البحار
وغنوا ليك الأغاني
وشكوا ليك الأسرار
على الشط قعدوا الحبايب
يقولوا فيك أشعار
لكن لا تروى عطش
ولا زرع ولا خضار
بين امواجك نعوم
وبنغسل الهموم وانت هادي مكار
ومن الرمله بنينا القصور
لما كنا صغار
اتصورنا معاك الصور
وشلناها تذكار
بس طبعك غريب قلاب

ملكش حبيب
ماحد قدر عليك
يوقف التيار
ولكن ليك سحر عجيب
بتلهمنا الأفكار
من هواك الجراح تطيب
وتلطف لنا شمس النهار
سبحان من خلقك وابدعك
وملاك ب الأسرار
لا امواجك بتخلص
ولا بتحلو من مية الأمطار
وموجك له زرقة بتريح الأنظار
يابحر موجك عجب
دايما مليون أسرار

سعر الليمون

قرأت أن الليمون ارتفع سعره بشكل خيالي دون معرفة
أسباب لهذا الجنون والمبالغ فيه من التجار

على آخر الزمن
بقي لل ليمون ثمن
آل ايه بيدلع وسعره بيولع
وهوه من نفسه
خليه يشوف نفسه
ده هديه للأرفان
بنعصر له ليمونه
زاد جشع التجار
ياريت يرحمونا

لازم منعبروش
طول عمره كان بقروش
على الرصيف مفروش
بيتاخذ فوق البيعة
دلوقتي بيتصور
على ايه بيتهور
على آخر الزمن
بقي للرخيص ثمن
بقي أعلى من التفاح
والماتجة والمشمش
ح نبطل نشتره ننقل
عليه كام يوم ...
لحد ماينشف
يصفر ويكرمش

ليه فى الحياة بنعانى

ليه فى الحياة بنعانى

ومن كلمة ب نتأثر

ليه بيجرى يوم ورا التانى

والزمن بيعدى فى ثوانى

وامتى أحلامنا ح تتفسر !

ليه اللى عايش وحدانى

محدث فيه بي فكر

ليه ناس تتعب عشان غيرها

ولاحد بيشكر ولا ليها بيقدر

ليه كلامنا كتير بيكون جارح

وبنسميه صراحة مش أكثر

ليه بنهتم بالقاسى والناسى
واللى فينا حتى ما فكر
ليه ب نأجل أهم أحلامنا
ونقول عليها ما بنقدر
ليه ب ننسى جبر الخواطر.....
ونخاف الناس علينا تتكبر
ليه لما بنتعاب بدل ما نتصالح
بنتخاصم وبتبقى خناقة وبتكبر
ليه الكلمة الحلوة بنخفيها
والكلمة الوحشة بيها بنتمنظر
ليه محدش قلبه على التانى ...
والكل بقى أنانى فى مصلحته بس يفكر
ليه بنخاف من الفرحة على قلوبنا...
ونقول خير يارب مش أكثر ..

ليه ساعات نقسى على روحنا
ونتعب اللي ريحنا وفرحنا
وننسى ليه حتى نتشكر
والله احوالنا دى غريبة
ياريت فيها نفكر !!
عشان لا يوم نندم على كلامنا
ولا احلامنا تتأخر
عشان مايفيد ندم على ماضى ..
ولا الحاضر يضيع على الفاضى
ويصبح ذكرى مش أكثر !!

الجو حر نار

الجو حر نار من أول النهار

لطفك يا كريم أنت بنا عليم

أصلح لنا الأحوال

نجينا م الأحوال

ع الحر مش قادرين

بقينا مفرهدين

واحنا كمان صايمين

ف البرد برادنين

وليه مش متحملين

ف الحر حرانين

ومنه مش طاقين

آه من شمس النهار
بتلسع زى النار
ف وشوش البنى ادمين
وعليها مش قادرين
ف العرق سايحين
وكنا متضايقين م البرد متك تكين
وقال مستعجلين ع الصيف ..
ونقول أحلى ضيف
وليه مستنيين
اصله حصيرته واسعة ..
واحلى ميه ساقعة
جالنا وناره لاسعه ...
من حرة ملهبين
ايه الحر ده

عمره م كان كده
ولا حتى من سنين
يمكن سرقوا الغلاف
وعلوا لنا لمس اكتاف ..
مع الشمس واصلين !
ولا عملوا تجارب ..
واحنا اللي مش عارفين !
وتقولك الأرصاء اشربوا ميه كتير
ازاي واحنا صايمين !.....
يارب يامعين
الطف بنا أمين ...

مشاغل

ب مشاغل تاعبين نفسينا

وكل يوم تكثر أكثر

ليه الحياة قاسية علينا

والفرحة دايمًا تتأخر

تتعب عشان غيرك يرتاح

وياريتاه حتى بيقدر

وكل يوم يجى صباح ...

مليان بمشاغل أكثر

حتى كلامنا عن الماضي

ب يخلينا نتأثر ونفكر

ولو فيه ذكرى جميلة ...

برضو عليها بنتحسر
زى اللمة ويا العيلة
قبل الحياة م تتغير والمشاعر تتبعت
هيا الأيام اللي بخيلة
وللا إحنا اللي م بأيدينا حيلة
وف دايرتها بدور ونلف
واحلامنا ركناها ع الرف
وب نستنى لما الظروف تتغير
ول أمتى ح نفضل نستنى
ونحلم ونعيش نتمنى
واحنا واقفين فى مكانا
وبحر الحياة موجه يحير
ومشاغل بتزيد ولا بتخس
ولا حد بغيره بيحس

حتى الحب لما زارنا
م لقينا اللي يقدرنا
ومنه تعبنا واحترنا
وقولنا اهو كله متقدر
ياترى العيب فينا
وللا الزمن مش حاسس بينا !
وبيجرى ويجرى الأيام بينا
ويرجعنا عليها نتحسر
وكأن الزمن بيغمينا
يقربنا من بعضينا ..يفرحنا ..
ويتعبنا ... ويشقينا ...
ونتوه ف طريقنا ونفكر
وتعبنا وطالت ليالينا
ومشينا طريقنا لوحدنا ...

و دينا ود واهتمينا....
باللى بالود ما بيقدر

وحاولنا نحقق أمانينا
ولا يوم حد حن علينا

ولا حتى ..الحظ فينا فكر
لكن بنحاول ونكافح بإرادة
وح نتغلب على الصعب وح نقدر
مادام المولى مراعيانا
ح يقوينا وح
يدينا الخير
أكثر وأكثر

هونها يارب

هونها يارب هونها

فرح ايامنا ولونها ...

كثر لنا الخير فيها

والفرح يبقى ماليها

خليها على الله خليها

ليه تزعل وتفكر فيها

اسمع ياللى معقدها

الفرحة ح تيجى ف ميعاها

لما ربك يأذن بيها

ايامك حليها

وعيش لياليها

لومالت اعدلها
بالصبر داويها
وبلاش تعقدها
حتزود ف عنادها ...
وامورك يسرها ...
وظروفك غيرها
الصعبة اكسرها
بارادة اقهرها ...
والوحشة عديها
ريك بيدبرها
وجروحك ح يشفيها
الكلمة راعيها وافهم معانيها
والضحكة عليها
كله متقدر

والمولى بيدبر

سلمها للمولى ...

هو يمشيها

والطبع غلاب ...

عمره م يتغير

اصبر ع اللى غاب

وعليك اتغير

اعرف ايه الاسباب قبل ...

ما تتحير

خفف من الاحزان ...

ارميها ورا ضهرك

ليه تفضل تعبان وينحنى ظهرك

عيشها بطلاقة ...

م الحب ليه تهلك ..

القلب له طاقة ...
مش سن ف بطاقة
شوف اللي يستاهلك
والقلب له واحد والعين
تشوف كثير ...
لو الحبيب جاد
ابعد من غير تفكير
وايامك حليها ...
وعيش لياليها ...
لو مالت اعدلها
بالصبر داويها

أعرف حبيبك

اللى أوله شرط آخره نور

واللى بيتلكك عشان يسيبك .

نفضله خليه يغور

مش ح تاخذ غير نصيبك

مهما سهلت الأمور

بكره الأيام عليه تدور

دى المحبه ويا الأحبه

بتخلى الدنيا حوالينا نور

والعتاب لو كترته حبه

منه ح تضيق الصدور

دور ع اللى يخلص ف حبك

واللى قلبه يرتاح لقلبك
مش اللى من غلظة يثور
ويخلى دمك يفور
اللى بيحبك راح يصونك
عمره ما يفكر يخونك
يمسح بكمه دمة عيونك
ويسهل عليك الامور
يبقى سندك لو الدنيا عليك تدور
اللى بيحبك يشاركك
لو ناسيه هوه فاكرك
لو تناديه على طول يجيبك
مش يقولك مش فاضيلك
وكأنه ح يعدى بحور
اللى بيحبك يحاوطك

ممکن یتحمل قساوتک

عشان حکایتہ من حکایتک

انت غایتہ وهو غایتک

بالحب والتفاهم

املاً حیاتک بالسرور

الحياة محتاجة

بسمه وكلمة حلوة

مش ناقصة ...

تعقيد للامور

واللى اوله شرط

آخره نور

عجائب

دنيا وفيها العجائب
والناس عايشين
اللى لقوا الحبايب
واللى لسه تايهين
دنيا فيها الغنى والفقير
والطيب والشرير
واللى صاحى الضمير
وفيها القوى والمسكين
واللى كلامه
زى السكاكين
فى ناس كلامها

يشرح القلب الحزين
وفى ناس كلامها
يجرح القلب السليم ...
وناس الكرم
فى طبعها غالب
وناس فى مكرها
غلبت التعالب
فى ناس تشوفك تسلم
وتقابلك بابتسام
واهلا وسهلا
وحلاوة لسان
وناس قاعدة ف السكة
بتشرب شاى ع الدكة
وتراقبك باهتمام

وكلامها ملاغية
زى عزومة المراكبية
وناس تلمحها تهرب
وتستخسر فيها السلام
وتتعوز من عنيتها
وتقول ياالله السلام
وناس ف الوش
أحلى كلام بالأحضان
.. عامل ايه
اخبارك ايه ...
وتنقل كل الكلام

وناس عشان
حاجات بتبيع حاجات
وناس عشان ساعات

ممکن تبیع سنین
وناس ف أعلى المراكز
وبردوا طماعين
وناس الهم راکز
على قلوبهم من سنين
وناس أصحاب مبادئ
في حياتهم تعبانين
وناس اصحاب مصالح
ومعاهم بالملايين
وناس زى الزمان
ملهاش أمان غداريين
وناس مليانة حنان
وقلوبهم طبيين
م الحظ مش واخدين

والدنيا فيها العجايب
والناس عايشين
فيها الاعداء قرايب...
والغرب متصاحبين
وكل سنة وكل اصحابي
وحبايبي طيبين ومنورين

متجيش أبدأ على نفسك

ليه تشيل وتحط ف نفسك

متجيش ابدأ على نفسك

اللى ينسأك انساه

واوعى تجرى وراه

أحسن تتعب نفسك

اللى يحبك ويريدك

قرب له ومد ايدك

تتهنى وتسعد نفسك

وللى م الفرح يزيدك

حبه ودلع نفسك

ف كلامك خليك هادى

مدام واثق من نفسك
واللى تشوفه مش عادى
حتى لو حلو وهادى
قلبك بيه مش راضى
ابعد ريح نفسك
عن قلبك أنت المسئول.
كلامك خليه معقول
ليه تشرح
والشرح يطول
حبيبك ح يفهم همسك
أفرح واتهنى
وبلاش تستنى
اوعى تبخل عل نفسك
طبطب على قلبك

بهدية هاتها لنفسك ...
اتكلم بلاش تتألم....
ليه تشيل وتحط نفسك
عيشها بسعادة ملهاش اعاده
خللى بالك من نفسك

قالوا فى الأمثال

قالوا فى الأمثال كلام عمرنا ما بنزهق من سماعه

من حبنا حبناه وصار متاعنا متاعه
ومن كرهننا فوتناه يحرم علينا اتباعه
صاحب الأصل واللى الزمن عمره ما يغير طباعه
ومحدث يأمن للغشاش اللى ف يوم باعه
وخلى بالك من البكاش مبتخدش منه غير صداعه
واللى يراعيك لازم تصونه وترد له ف يوم الجمال
خفف همومك وأبتسم وبلاش تفضل اللهم شائل
ومن أمنك لم تخونه حتى لو كنت خاين
بيت النتاش ميعلاش مهما كان عليه العز باين

واللى مايسمع ياكل لما يشبع وبلاش تستنى التجارب
مش كل كبير حكيم حتى لو كان الشعر شايب
عيش مستقيم قلبك سليم وخذلك من الفرح نايب
خللى بالك من اللنام واللى عاملين لك حبايب
واضحك وانشرح بس او عى صباeck ينجرح
خليك نبيه ف الكلام مش كل كلمة لازم تنشرح ...
وقالوا يامستكتر الزمن أكثر أمشى بتوازن وبلاش تبذر
من غير ما تبخل على نفسك او تستكتر
ياشايف الجدع وتزويقه ياترى فطر ولا لسه على ريقه
أوعى المظاهر تخدعك ولا كلمة حلوة توقعك
وقالوا يامستنى السمنة من بطن النملة حرمت عليك التقلية
أوعى تستنى حاجة عمرها ماهى جايه
وهى شوية أمثال منى ليكم هدية

صور زمان

صور زمان أبيض وأسود

مش ألوان

فيها ذكرائتنا وأيام حياتنا ...

مع الحبايب والخلان

البسمة حلوة على الشفايف ..

لا حد خايف ولا قلقان

فيها البساطة من غير الاطة ..

وشعر نازل على الودان

صور زمان نفرح بيها

وكان اللي عدا لمحة زمان

كانت أحلامنا حلوة بريئة ...

تفرحنا عروسة رقيقة عنيتها
جريئة تضحك تغنى وتعمل موسيقى
وتقول بابا وماما كمان
و معاها شنطة فيها مرايا
زى شنطة ماما تمام ... وكورة شقيه
دايما تنط عند الجيران
صحاب حبايب .. اخوات قرايب
ورحلات جميله مع الخلان ف صور زمان
ولما نجحنا فرحوا معنا كل الجيران
ولمة عيلة وحفلة جميلة
عشان نجحنا ف الإمتحان
أيام زمان الأكل كان آخر لذاذة
كان كل يوم صابح وطاظة ..
وفسح جميله ف الصيف كمان

وألف ليلة وليلة ف الإذاعة

وأجمل أذان فى رمضان...

وفانوس

مدور بالليل ينور

ووحوى ياوحوى يا رمضان

كانت الشوارع هادية جميلة

ومدرستنا جنب بيتنا اللى كان ع الميدان ..

بلكونتنا مليانة ورد وريحان

نصبح يوماتى على الجيران

وعدا وجرى بينا الزمان

وبنشوفه ف صور زمان

دنيا قاسيه وبعيشها

دنيا قاسيه وبعيشها

ببطببتها وخرابيشها

ويوماتى ناكل من عيشها

فيها ناس هايصه وناس لايصه

وناس مش عارفه تعيشها

وناس تقول لك عديها

وافهم بقى معانيها.....

د محدش مرتاح فيها

لكن بنعافر ونعيشها....

أيام حلوة واسعة جميلة

وأيام مرة ثقيله بنحاول نكشكشها

وناس عاقلة وأصيله
وناس بتعانى من طيشها
وبنشكى من برد شتاها
وبنشكى من حر صيفها
فيها المظلوم وفيها الظالم
اللى لحقوق الناس هابشها
فيها ناس بتعلى وتتعالى
وناس مكافحه شغاله
وبتعانى من تهميشها
فيها اللى شايل الهم قايم نايم
وتزود عليه كلابشها
فيها اللى على وشها عايم
ومفرح نفسه ومطنشها
وعارف ازاي يفرشها

ليها رب كريم عالم
بأحوال الناس قادر يعدلها وينعشها
ودنيا قاسيه وبنعشها
بطبببتها وخرابيشها ويوماتي
ناكل من عيشها

دارى

دارى على حبك دارى

دارى على فرحك دارى

يا لى بعيون الناس مش دارى

ما تقولش كل اللى ف قلبك

مش كل الناس ح تحبك

يبقى نجمك بيلاى

أوعى تشغل قلبك

ب لى ب حبك مش دارى

من كلمة تفضل حيران

واللى قالها مش دارى

تقضى الليل سهران

ولا حد بحالك دارى
عمر الحب م كان له أوان
دا فنظرة العين ببيان
مهما فيه ح تدارى
دور ع اللى شارى
دايما مشتاق لك خايف على قلبك
يمكن بيحبك وأنت بيه مش دارى
ايه فايذة الحب ف قلبك
وانت فيه بتدارى
لحبيبيك روح له وقول له
معاك العمر كله وبحبك ليلى ونهارى
عبر عن حبك يرتاح قلبك
أفرح وتهنى وبلاش تستنى
ل العمر يعدى وزمانك يجرى

وانت به مش داری
داری علی حبك داری
داری علی فرحك داری

فينك يا جميل

فينك يا جميل يا جميل فينك
راح فين الود بينى وبينك
حاولت انساك م قدرتش
وقلبي نداك م سمعتش
مش عارف إيه بينى وبينك
حاسس بدمى من دمك
شايلك ف قلبي ولا همك
طيفك تملى على بالى
وأنت ولا دارى بحالى
إمتى أشوفك ياغالى
دا القرب منك يحلالى

ولاقى نظرة حب ف عينك
ولا فيش بعاد بينى وبينك
فينك ياجميل ياجميل فينك
إمتى ألقى أيدى ف إيدك
تنسى عشانى مواعيدك
وتقولى شاريك وبريدك
ولا فيش عزال بينى وبينك
ولا حتى أحباب شاغلينك
تعالى قرب من قلبى
ما تقولى إيه عنى مخبى
هو أنت خايف من حبى
تعالى هات عينى ف عينك
نفسى أقرب من قلبك
يا فرحة قلبى وانا جنبك

يكونشى قلبى طب وحبك
خلى السر ده بينى وبينك
فينك ياجميل ياجميل فينك
راح فين الود بينى وبينك

مالك يا قلبى

مالك يا قلبى ماتقول لى مالك
مين اللى خيب كل امالك ...
نفسى أعر ف جواب سؤالك
شايل هموم الناس بحالها
ومحدث فيهم حاسس بحالك
ياريت ألقى قلب بدالك
من كلمة حلوة تاخذ ف وشك
تفرح .. تصدق والناس تغشك
ياريت يا قلبى تفضل ف حالك
كل ماتبنى آمال جميلة يهدوها لك
دايما بتغضب يا قلبى منى

خائفة عليك لو ضعت منى
أجيب منين قلب بدالك
عمال بتشكى من الأحبه
ولما تشوفهم بتستخبي
هيه الفرحة مش مكتوبه لك
وكل مرة تضيع آمالك
ياريت يا قلبى للعقل تسمع
مش كل مرة تندم وترجع ..
خايب آمالك
حرام يا قلبى
خليك ف حالك

حب من غير تفكير

حب من غير تفكير
دا محدش ع الحب كبير
قرب و مترددش كتير
قلبك هو اللى يدلك
أصرف من غير تبذير
وحاسب دا البخل خطير
أوعى تحب المال يا كبير
ومتخليش المال يدلك
الدنيا ليها رب كبير
لو تهت هوا ح يدلك
أفرح ومرح غنى كتير

مشى أمورك من غير تكدير
حاسب م الحزن دا خطير
ممکن ف لحظة يكبر ويضرك
خد قراراتك بالتفكير
وصاحب اللى يستهلك يا أمير
خاف من إلی ف أخبار الناس ينقل لك
عيش ببساطة وحب الخير للغير
زى مايتحبه لنفسك
ووسع دايمًا على أهلك
أوعى من كلمة تبات زعلان
وتشيل وتحط ف قلبك
ل الصحة تروح ف التوهان
ومتعرفش تنام من تعبك
خلى خلافك من غير زعل

أبعد عن اللى عليك انفعل
ولو كنت فى امورك حيران
فضفض مع حد يحبك
ربى ولادك وافرح بيهم
علمهم ومن خيرك اديهم
ومن عين الناس ارقهم
ودعى ربك يهديهم
يسعدهم ويفرح قلبك
وانت سايق سوق على مهلك
بجنونك ممكن تهلك
أرجع بسلامة لاهلك
إطلع رحلات رفه عن نفسك
كل أكلات ما تسدش نفسك
خد الحكمة من الحكماء

أوعى تخاف من الأخطاء
اقرا كثير غدى عقلك
العلم بحر كبير روح له
ومتستناش يندهك ...
الدنيا أخذ وعطا
لو دنياك متلخبطه
اتعلم اسأل أتكلم
م تخافشى ابدأ من جهلك

أيام زمان

آه لو يرجع بينا الزمان
ويعيد لنا أيام زمان
أيام كلها أمان وحنان
أصحاب وأهل وجيران
وفرحة كبيرة بفانوس رمضان
ولمه ساعة المغربيه مش مهم ...
سفرة أو طبليية المهم اكلة هنيه
وأيام المدرسة والواجب والزوغان ...
من حصة الألعاب والرسم بالألوان
وجرس الفسحة والكننتين
وحوش المدرسة والتمارين

وفرحة العيد باللبس الجديد
والشنطة والفستان وبدله للصبيان
أيام المرح والفرح والروقان
فيها المودة والرضا بالقليل
وكل شئى كان فيها جميل
فرحة بالرحلات للاهramات
وحديقة الحيوان ..
وعدا علينا الزمان
أيام كان الجنيه لسه بيه
مكاشى لسه راحت عليه
كبرنا وشوفنا الحياة
من غير تجميل ...
وعرفنا الغدار والاصيل
وقالو سنة الحياة التفاصيل

وجميل الطبع يا محلاه
أحلى من اللى شكله جميل
وشوفنا بختنا
واللى مكتوبلنا عرفناه
واللى ياما استعجلناه
ومحدث خالى م الهم يا ولداه
والخالى م الهم قليل
وعرفنا قيمة اللى
عدا والزمن الجميل
وبيفكرنا بيه أغنيه
او دعوة حلوة
من حد أصيل
آه لو يرجع بينا الزمان
ويعيد لنا أيام زمان

اللى يعيش ياما يشوف

قالوا اللى يعيش ياما يشوف

واللى يمشى يشوف أكثر

أعمل ف نفسك معروف

أوعى دمك يتعكر

دى الصحة نعمة ما تتقدر

من غيرها العيشة تتكدر

أوعى تتاثر بظروف ولا من كلمة

تزعل وتفكر

اللى متميز معروف

حسادة دايمًا تكثر

ف الدنيا ياما ح تشوف
أيام مرة وأيام أحلى م السكر
أعمل الخير وانساه
مش لازم بالخير تتمنظر
أوعى بكلام الناس تتأثر
وتخلى قلبك يتحجر
وف المعروف اعمل أكثر
آملا حياتك حب وخير
وبلاش تتعشم ف الغير
دا العشم ف الله أكبر
وكلامك أفهم معناه قبل م تقوله
ماتفكر
وإياك عل أهلك تتكبر

واللى يبيحك لازم تنساه
ولاتندم ولا تتحسر
اللى عدا ماضى وفات
أهتم بالحاضر أكثر
كل اتنين بعده ثلاث
والأفراح حواليك راح تكثر
والحب ف يوم راح تلقاه
وكله بأوانه متقدر
حتى لو غاب استناه

يمكن جاى على مهله بيتمخطر
سيب الماضى وانسى آساه
خد منه خبرة مش أكثر
عيش الفرحة وشارك فيه

أيامك ح تنور بيه

أتفائل دايمًا بالخير
غنى وافرح زى الطير
خلى تو كالك على مولاك
أفهم حكمة ربك .. فكر
دا اللي يعيش يما ح يشوف
واللى بيمشى ح يشوف أكثر

نجينا ف كل الأحوال ،،،،،
من كل الى نعرفه
واللى مخطرنا على بال ،،،
يارب يا عالم بالحال
يارب انا بناديك ،،،
تكالى واعتمادى عليك
نحمدك فى كل الأحوال ،،،،،
وتجبرنا جبر
اجمل من أمانينا
ودعواتنا
ومكنش يخطر على البال

اهى ايام بتمر علينا
يمكن تتحقق امانينا
ياما تعبنا ياما اسينا
ياما قسيت الدنيا علينا
لكن ربك ببعدها
وزى ماترسى دقلها
واحلامك أوعى تأجلها ،،،،،
وعلى رف عالى ليه شايها
او عى لليأس تسلم ،،،،،،،،،،،
دى دنيا فيها ومنها بنتعلم
ومسيرك ع الحظ تسلم ،،،،،
ومسير الايام تتبسم
وزى ماترسى دقلها ،،،،،
وان مالت حاول تعدلها

عيش الأيام

عيش الأيام يلا عيش

حلوة مرة متنقيش

عيش بتصميم و ارادة

حتحس بأحلى سعادة

وبلاش تشربها سادة

خليها سكر... بزيادة

وان كانوا حبايبك ظلموك

وفى وسط الطريق سابوك

وناديت عليهم ولا سمعوك

انساهم وحاسب على قلبك

ل الصحة تروح متجيش

عيش الايام يلا عيش

متقولش انا وحدانى
ازای ابدأ من تانى
وتنوح وتقول اه يانى
ليه كدة يازمانى ده الى
جرالى ميتحكيش
عيش الايام يلا عيش
ومسيرك تفرح وتغنى
وتقول للفرحة هنا استنى
نسيانك كان غصبن عنى
ياما جيتى وملقتيش
عيش الحياة يلا عيش
لون ايامك حقق احلامك
دى مفيش ازمه مبتنتهيش
عيش الايام يلا عيش حلوة مرة متنتهيش

الشاعرة فى سطور



نبيلة محمود

شاعرة عامية
بكالوريوس تجارة شعبة
ادارة أعمال - جامعة القاهرة
دبلوما تسويق من جامعة عين شمس
دبلوما ادارة عامة من الاكاديمية العربية للعلوم والتكنولوجيا
ماجستير ادارة .. من الاكاديمية العربية للعلوم والتكنولوجيا
والنقل البحرى
مدير عام سابق بالبنك العقارى المصرى العربى
حازت العديد من التكريمات وشهادات التقدير وآخرها لقب صاحبة
أفضل إصدار عن كتاب (عرفنا خلاص) عن مؤسسة النيل والفرات
حضرت العديد من الأمسيات والندوات الشعرية فى مصر

صدر لها :

عرفنا خلاص (ديوان شعر 2019)
عن مؤسسة النيل والفرات للطبع والنشر والتوزيع (الطبعة الأولى -
أغسطس 2019)
بحر الحياة (ديوان شعر)
عن مؤسسة النيل والفرات للطبع والنشر والتوزيع (الطبعة الأولى
- أغسطس 2019)

لها تحت الطبع :

عرفنا خلاص (ديوان شعر 2019)
مرآة الحب (ديوان شعر)

محتوى الكتاب

2	بطاقة الكتاب
3	إهداء
4	بحر الحياه
6	ضحك السنين
11	حب الناس
15	الحب قدر وللاقسمة
21	شوية حنان
24	لو تسمحي
28	حبينا من قلبنا
32	يا بحر موجك عجب
35	سعر الليمون
37	ليه فى الحياه بنعانى
40	الجو حر نار
43	مشاغل
47	هونها يارب

51	إعرف حبيبك
54	عجائب
59	ماتجيش أبدا على نفسك
62	قالوا فى الأمثال
64	صور زمان
67	دنيا قاسية بنعيشها
70	دارى
73	فينك يا جميل
76	مالك يا قلبى
78	حب من غير تفكير
82	أيام زمان
85	اللى يعيش ياما يشوف
89	يارب
92	زى ماترسى
94	عيش الأيام
96	الشاعرة فى سطور
98	محتوى الكتاب